

# 53% rakyat Malaysia tidak saring kesihatan

Jumlah itu menggambarkan kesedaran terhadap saringan kesihatan dalam kalangan rakyat masih rendah

Oleh NOOR AINON  
MOHAMED YUSOF  
IPOH



**Khairy (kiri) bertemu dengan pengunjung pada sesi *walkabout* selepas pelancaran Jelajah Agenda Nasional Malaysia Sihat peringkat negeri dan Inisiatif Saringan Kesihatan Kebangsaan di Ipoh pada Sabtu.**

**K**ementerian Kesihatan menganggarkan kira-kira 53 peratus rakyat Malaysia dewasa tidak menjalani saringan kesihatan dalam tempoh setahun yang lepas.

Menteri Kesihatan, Khairy Jamaluddin Abu Bakar berkata, jumlah tersebut menggambarkan kesedaran terhadap saringan kesihatan dalam kalangan rakyat masih rendah.

Menurutnya, inisiatif Saringan Kesihatan Kebangsaan (NHSI) dilaksanakan sebagai usaha menggalakkan rakyat terutama berusia 40 tahun dan ke atas menjalani saringan secara berkala.

"Menerusi inisiatif ini, kita menyasakan 1.5 juta rakyat yang berusia 40 tahun ke atas dan yang belum pernah melakukan saringan untuk mereka melakukannya sebelum akhir tahun ini.

"Dengan program saringan kesihatan antara lain melalui Kementerian dan ProtectHealth menerusi Skim Peduli Kesihatan B40 (PeKa B40), kita menawarkan saringan kesihatan yang komprehensif secara percuma.

"Saya yakin dengan inisiatif ini, kita akan dapat kenal pasti lebih ramai lagi

memerlukan rawatan seperti pra kencing manis. Kita akan dapat mengurangkan dan mengawal bilangan rakyat menghidap penyakit," katanya di sini pada Sabtu.

Khairy berkata, klinik-klinik swasta diminta untuk terlibat sama melaksanakan program turun padang ke kampung-kampung dan kawasan pedalaman.

"Kita tidak mahu rakyat susah payah datang untuk dapatkan saringan kesihatan.

"Antara inisiatif adalah program di kawasan tumpuan ramai selain penglibatan klinik swasta untuk buat program *outreach* di pedalaman," ujarnya.

Sementara itu, Khairy memaklumkan rekod imunisasi kanak-kanak dan kesihatan kini boleh diakses di telefon bimbit menerusi aplikasi MySejahtera.

Menurutnya, ciri terbaru itu merupakan langkah awal Kementerian

untuk MySejahtera digunakan sebagai pendigitalan maklumat kesihatan yang sebelum ini disimpan secara manual.

"Dengan adanya kemas kini terbaru itu, buat kali pertama rakyat Malaysia boleh menyimpan rekod kesihatan peribadi mereka secara digital dalam MySejahtera bermula hari ini (Sabtu).

"Sekarang ini tidak perlu lagi buku imunisasi. Sijil vaksinasi kanak-kanak di bawah Program Imunisasi Kebangsaan akan disimpan secara digital dalam MySejahtera boleh dibawa ke mana-mana sahaja sebagai bukti vaksinasi," katanya.

Menurutnya, ciri baharu untuk rekod imunisasi bayi bermula dengan kelahiran pada 1 Julai 2022 juga kini boleh didapati dalam aplikasi tersebut.

Mengulas kemungkinan data diceroboh, Khairy menegaskan bahawa ciri-ciri keselamatan aplikasi itu sentiasa dipertingkatkan.